

四庫全書

集部

欽定四庫全書

集部

居竹軒詩集卷二

詳校官編修

臣范來宗

中書

臣

劉源溥覆勘

覆校官主事

臣李駿

校對官主簿

臣汪日贊

謄錄監生

臣唐作梅

欽定四庫全書

集部五

居竹軒詩集總目

別集類四元

卷一

操

古詩七言

古詩五言

卷二

律詩五言

律詩七言

卷三

律詩七言

卷四

絕句五言

絕句七言

臣等謹按居竹軒集四卷元成廷珪撰廷珪
字原常一字元章又字禮執揚州人好學工

詩不求仕進惟以吟咏自娛奉母居市廛植
竹庭院頗有山林間意因扁其燕息之所曰
居竹軒晚遭世亂避地吳中蹤跡多在峯泖
故集中有卜居海上之作後竟歿於松江年
七十餘矣其故人部肅劉欽搜輯遺藁彙而
刻之廷珪與河東張翥為忘年友其音律體
製得於翥之切磋者為多而聲名亦幾與之
埒劉欽常稱廷珪五言務自然不事雕剗七

言最工深合唐人之體今核其集知欽所言
尚非過譽而七言古詩清華道麗頗近姜夔
一流亦自琅琅可誦惟五言古詩竟無一篇
似不應全體遺佚或自知非其擅長遂不復
作殆所謂善藏其拙者與乾隆四十二年五
月恭校上

總纂官臣紀昀臣陸錫熊臣孫士毅

總校官臣陸費墀

居竹軒詩集原序

成君原常之為詩既博取選唐中州而長之故發乎情者雖若憤慨思憂與夫婆娑暇豫也而無不深致其功焉余在廣陵時嘗與周游乎山僧野士之寓或臨大江眺羣峰或升蜀岡坐茂樹未嘗不詩是作也其或風日之朝燈火之夕樽俎前而几杖後未嘗不詩是談也方其索句雖與之論說應答而中實注思揣練有得則躍躍以喜一字或聲必帖乃已信乎深

致其功也如此間嘗語余曰吾仕宦無天分園田無先業學藝無他能唯習氣在篇什朝嘏夕諷聊以自娛其間逸非復求聞於世也仲舉深知我得不薦之以言而時出以自省乎余誼不容辭以跋涉世故未能一引筆也今乃不遠數千里緘所作居竹軒稿以尋宿諾焉遂為書於編曰余學之大氏詩以法為守以聲為準以神為用故法貴整嚴法不整嚴則聲為之散矣而聲貴諧婉聲不諧婉則神為之黯矣而神

貴飛動神不飛動則徒法矣三則猶持衡然首重則輕
末重則軒唯適於稱焉爾若詩亦稱矣固平昔所深許
者也又將焉告輒為正誤五字且錄之而藏於蛺閣之
竹素房河東張翥書

成君原常隱居廣陵養太夫人甚謹因不出求仕其所
與遊多至尊顯亦莫有薦用之者四方士之過淮東或
久留或即去必以君為之依君周旋款洽曲盡其意於
是藹然長者之譽君好讀書尤工於詩比得其詩一編

其憂時而閔俗憤世而嫉哀及其闕也則有凌雲霞入

霄漢糠粃萬物之興要皆發乎至情非有所勉強矯揉而為之者也李唐之世能詩者最多而工部員外郎杜公為甚豈非以其忠君愛國之意類詩人之思致君之詩蓋於是歟嗚呼杜氏所遭之時干戈搶攘生靈塗炭危若綴旒故其言之哀痛迫切殆不期然而然後世能知之者唯王荊公梅都官而已讀二君子之為賦未嘗不掩卷而太息若乃憲宗之世命將相平吳元濟于淮

石時則有若柳刺史表上平淮夷雅自以為施諸後代
猶唐之光明今天子詔遣大臣出討首拔彭城旬日奏
捷以君之才當效柳氏作上之朝廷以配江漢常武傳
示于無窮不既盛矣乎因書以歸之至正十二年孟冬
五日臨川危素書

余嚮在廣陵識成君原常雖居於市廛而植竹庭院間
綽有山林意趨扁其燕息之所曰居竹日與高人碩士
遊行吟舉觴悠然自得舉世務之可尚可慕者視之若

浮雲唯意於詩五言務自然不事雕劇七言律最為工
深合唐人之體其交游則仲舉張公為忘年友載酒相
過殆無虛日故其詩之音律體製蓋有得於仲舉者多
焉擾攘以來飄泊南北復會于吳門與先生游年已七
袞餘矣怡然與常時無異所作之詩視昔為尤進而流
離悲壯之態感慨激烈之情有不能自己者今先生已
歿于雲間其全集未獲盡見姑以所得於吳中并昔年
記憶者若干首乃得先生故人劉君叔讓彙而授之耕

岩刻梓以傳甚盛事也故序其大概於篇首云京兆部
肅序

古人評詩必觀出處之大節與其所遭之時而後人之
賢否不離於性情文字之間已可見矣大抵治平之時
其聲和而婉顯榮之人其氣舒以安不然則太息於干
戈擾攘之際者多迫切之詞呻吟於牛衣鶴埵之下者
多憤激之態其去溫柔敦厚之教益以遠矣何足以垂
於不朽乎往者河東張公仲舉以詩鳴於廣陵追而和

之者有成君原常焉南北之士一時莫不稱讓其後張公被召入翰林躋顯仕所以黼黻聲猷詠歌所志者其境順而易而原常栖遲山林繼罹兵革年日以衰身益以困顧以忠厚之氣發而為和平之聲卒亦與張公相頡頏所謂逆而難者也余識原常于吳門觀其扁舟往來於洞庭笠澤之墟逍遙乎雲水之上凡所涉歷一寓於詩能揣練六朝之情思以入唐人之聲律變化尋常之言為警拔之句終歸於適其性情勸為忠厚而已夫

豈置一毫窮鬱不平之態於其間哉昔孟浩然一失意於明皇猶不能忘情於篇什陸魯望在唐之季每寄憤於煙朝月夕之外若原常者雖不遇而終無憾焉其詩可傳而其為人可知也丙午歲吳中鄒奕序

居竹軒成先生曩居廣陵與先君友善每侍談論不覺終日服膺請益積有年矣風塵瀕洞各天一方後甯先生寓雲間則已捐館哀悼之餘思先生平昔留意詩什贈灸四方先生雖亡而有未嘗亡者存焉以余向所誦

記及今收采於友朋者分彙成帙以壽諸梓嗚呼以先生之才之德而肥遁夷猶吟哦自放樂乎天而不求於人者先生之志也至若晚年遭亂奔走艱難鬱抑謝世使人若不能無憾者卷中所存莫不鏗鏘珂珮而追躡風雅與昔賢齊驅則先生又何憾哉謹以諸名公所序先生出處及贊詩之工妙者刻於卷端因述余所不敢忘先生者以綴於後中山劉欽謹識

欽定四庫全書

居竹軒詩集卷一

元 成廷珪 撰

操

題王彥龍藏三茅郎元隱墨蘭

登勾曲兮常良攬薜帶兮筠裳
紆白駒兮空谷葆九鳳兮扶桑
汎光風兮既零雨水淺淺兮石
楚楚望夫君兮不來悵清風兮
日將暮

古詩七言

送周草牕尊師歸廬山太平宮

匡廬之山仙所居銀河倒蘸青芙蓉
三千里路昔一往十八社友今何如
向來匡君結廬處至今海月懸高樹
水流花落春復春洞府蒼茫隔煙霧
西風蕭蕭吹短衣賣藥修琴不歸去
潯陽潮落海欲枯幾時再得麻姑書
桂風不跨林下虎回仙肯顧盤中魚
幸留神物守丹鼎近喜弟子迎飈車
世間信有揚州鶴看汝乘之上寥廓
晴窻須理白雲篇爽氣仍開紫霞閣
袖中寶劍且藏鋒

彭蠡小龍方睡着

題婁仲瑛山居圖

近代幾人畫山水郭畀無人朱敏死後之作者徒紛綸
得骨得皮誰得髓聞君掃却山居圖令我見之心獨喜
前山環伏似虎蹲後山奔騰若龍起緣溪草堂星散居
嘉樹陰陰雲旖旎豈無采藥古仙人亦有看書兩君子
七十老翁居竹間老去胡為在城市君如有意肯相過
貌得滄江弄清泚

送天長縣學教諭孫允誠任滿歸金陵

憶昔君方少年日文帝潛宮曾一識龍飛上天不可扳
圖畫空餘兩奇石閉戶讀書三十秋一線為官十領職
天長令尹莫我知首藉朝盤勝肉食三年官滿來揚州
僦屋正近橫江樓門前車馬日如市談經講易皆公侯
公侯滿座即沽酒典却篋內青氈裘鄉心苦憶長千里
明日君當渡烟水中山李桓文中雄乃是君之渭陽氏
深夜再拜如母存故宅重歸令客喜豈無舊業問松筠

亦有清輝照桑梓青雲熟路君何如白髮滄江吾老矣

丁十五歌

丁十五一百健兒如猛虎幾年橫行青海頭牛皮裁衫
桑作弩射陽湖上水賊來白晝殺人何可數將軍宵遁
旌旗空倭甲蠻刀賊為主西村月黑妻哭夫東塢山深
母尋女屋廬燒盡將奈何往往移家入城府不是丁家
諸健兒仗劍誰能翦狐鼠樓頭醺酒齊唱歌爭剖賊心
歸釁鼓官中無文立賞功還向山東販鹽去

春夜曲

芙蓉樓前拜新月
寶鴨微薰透銀葉
吳山楚水送遠遊
不管閨中照離別
誰家玉鉤飛上天
一似連環舊時缺
缺多圓少將奈何
一寸愁腸萬里結
為郎白苧裁春衣
又恐月圓郎未歸

江南曲

吳姬當壚新酒香
翠綃短袂紅羅裳
二盆十千買一斗
三杯五杯來勸郎
落花不解留春住
似欲隨郎渡江去

酒醒一夜怨鵲啼明日蘭舟泊何處

戚戚行

戚戚復戚戚白頭殘兵向人泣短衣破綻露兩肘自說
行年今七十軍裝費盡無一錢舊歲官糧猶未得朝堂
羽書昨日下帥府然燈點軍籍大男荷鍤北開河中男
買刀南討賊官中法令有程期笳鼓發行星火急阿婆
送子嬭送夫行者觀之猶嘆息老身今夕當守城猶自
支更月中立

射鴨謠

阿儂手挽竹枝弓射鴨綠楊湖水東
三三五五似學武一箭誤中雙飛鴻
前船唱歌後船哭月黑湖中夜潛伏
東海健兒不敢過人命幾如几上肉
老翁入縣前致詞
夜夜全家猶野宿丁寧門戶且勿開
明朝又怕官軍來
哀老卒

白頭老卒衣欲穿日日織屨能幾錢
點名去討海東賊別家泣上城南船
自云十五入行伍掠陣爭誇力如虎

賣刀買酒看昇平六十年來不用武將軍醉即騎馬歸
猶散黃金教歌舞中原上馬賊更多白晝殺人誰作主
我今老去死即休白骨填海何人收朝堂昨日下午黃榜
誰家年少當封侯

聞中原河決盜起有感

中原九月黃河水平陸魚龍吹浪起飛霜蕭蕭鴻雁來
禾黍漂流桑棗死大風怒號揚飛塵白晝剽掠如無人
官軍不誅海東賊縣吏乃殺西村民夜聞羽書起丁力

老稚嗷嗷向誰泣我當六十將奈何扶杖淮南望淮北
題方方壺遙山古木圖為桂元芳賦

千年老蛟方蛻骨蹇偃長身擘厓出山樵熟視不敢近
似有雷霆護神物仙人來自方壺山何以寫此留人間
樛枝風動鐵交屈蒼皮雨溜苔爛編薌溪先生讀書處
對面高標起烟霧會將用汝作靈槎八月因之上天去
熊松雲畫秋林詩意圖送蔡伯雨道士歸上清
松雲在淮陰今其來因見題以贈之就以東

送方壺隱者

松雲先生江海客，淮陰市中人不識。
驚風吹沙眼倦開，枕上青山歸未得。
上清蔡君仙之徒，邂逅同覓黃公壚。
飲酣脫帽忽大叫，乘興為寫秋林圖。
蔡君視之一撫掌，筆法擬我方方壺。
我家山中舊遊處，如此長松幾千樹。
仙巖隱者抱琴來，鬼谷高人喫茶去。
先生有意肯相從，分與東頭一間茆屋住。

辛卯秋旱已極至八月晦天大雷雨

八月晦日雷怒號大雨如注風蕭騷捷如鬼神撼山嶽
湧出江海翻波濤屋茅平卷一重去河水忽漲三尺高
驚鴻翅溼飛不起散亂中澤呼其曹雲龍有意洗兵甲
下與蒼生舒鬱陶浮雲收歛赤日見天宇廓遠無纖毫
歲年不逢亦偶爾吾將種麥耕東臯

裴氏二節婦之詩為屯田房千戶作

昔年夫君死漳戍恨不從之泉下去有弟萬里負骨歸
獲鹿原頭與封樹是時孤兒方學行天地容身復何處

此心匪石石可移誓欲教兒如汝父兒成取嬭身始閒
一旦兒亡豈能顧婦姑相守到白頭至今不識門前路
夫家趙郡知幾年鄉里嘗旌兩節嬭向來我識房將軍
乃是節婦之姪孫歲時寧忘俎豆事水旱肯廢雲山屯
忠臣烈女有如此千載義事輝高門

送萬嘉會教諭之山陽

西江萬君頭戴笠清時典教山陽邑王侯折簡不可招
令尹之前只長揖深衣上堂開講筵衿佩鏗鏘如鵠立

六經字字在所行要使儒風更俗習朝盤苜蓿甘如飴
不羨諸公謀肉食人材作養期有成他日當為教官式

湘江秋遠圖

蒼梧愁雲拂烟水日暮無風波自起何人吹簫作鳳凰
髮披臨江迎帝子黃陵女兒情更多却掩冰絃淚如洗
千年遺恨人不知坐對空山疑夢裏

送李教諭避亂歸鄱陽

長淮九月秋風高水恠百出生波濤吳檣楚柁不敢渡

人命委棄如鴻毛山精白晝作鬼語野狐黑夜如人嗥
縣齋博士最憂者中宵起聽荒雞號豈無強弩射其上
愁來磨損胸中刀平生讀書弗見用拂衣歸卧番江臯
知幾未落季鷹後對客且放元龍豪東書三日先告別
令我不樂心忉忉時運忽來烏可遏憂患卒至將安逃
高歌激烈不肯住哀柳何以維輕舸臨岐大醉意不已
更過西家沽酒醪

四明張文海母婁節婦詩

貞節之婦何代無大節直與忠臣俱高風凜凜出肝胆
皎如日月行天衢江淮喪亂復何有衣冠掃地悲窮途
眼明見此節婦傳胃中憤氣為之蘇夫君疾病有遺語
身後之事當何如有高堂之老姑下有乳哺之二雛
浮雲無根白日短黃塵有盡滄溟枯滄溟易枯日易短
妾心到死終難渝夫君一去三十載二雛惇立今為儒
邇來世俗薄如紙撫琴南望空嗟吁為臣不能報明主
七尺有軀空丈夫嗚呼七尺有軀空丈夫

半山歌為餘干周隱君作隱君早歲江湖中有
半山行藁三十年晚歸冠山終老焉

番陽臺上生春草湖外之山為誰好滄波日日送征帆
多少行人此中老翁昔少年初遠遊吳楚東南事幽討
江海詩名三十年盡攬風烟入行橐歸卧冠山一半雲
知足由來合天道黃金似水供歲時白髮如霜照清昊
却留一半與諸君若個似翁歸亦早傍人錯比爭墩翁
翁若聞之應絕倒

雪中歌為王子中賦

王郎不知何許人一舟橫泛江之濱風清月霽未肯出
滄洲獨與天為隣洞庭烟水兩寂寞十年不見君山春
北風三日雪大作挂蓆張帆以為樂手中鐵笛吹紫凰
身上氅衣如白鶴拍浮滿載百壺酒奚足蓬牕供獨酌
剡中隱者毋相疑迺與戴老同襟期更闌酒盡雪未止
趣棹欲返猶遲遲今夕何夕此乘興千載未必無人知

悲徐州

彭城八月風塵起數郡義兵多戰死良家子女復何辜
盡作黃河水中鬼髑髏填海幾時歸千古沉寃無處洗
王師一日天上來虜船夜欲浮橋開守橋將軍不敢敵
狂瀾倒瀉聲如雷三山回望平如掌野曠猶聞金鼓响
軍中少年當封侯爭入轅門請功賞江邊老翁死即休
血淚沾襟空白頭

題畫史王夢麟卷

老翁窮居廣陵市四壁蕭然祇圖史題詩不博一文錢

空瓦磨窮空費紙不如鄉里諸妙年翰墨游戲王公前
解衣盤礴作山水一幅何惜千金捐何人最得滄洲趣
麟也於今稱獨步狂吟寄興肯相過畫我東橋竹居趣

延祐三年東平申屠先生掾山南憲司行部夷
陵毀曹操祠為孔子廟歌頌賦論者夥矣後
四十年余亦賦一首

西陵歸來忽千古操也何嘗稱魏武黃牛峽口不曾來
亦有巴人建祠宇巴人日日迎送神男能唱歌女能舞

一方說是鬼奸雄血食依憑出巫語精靈託汝據荆襄
魂魄何由歸鄴許今年偶值申屠君削吾尊壘徹吾俎
茫茫窮壤復何之夜夜荒林怨風雨無顏可見山陽公
有恨猶思茂陵土當時賊漢豈獨孤同日舉兵皆可數
高文一落在人間只得群公削狂虜寄與扶傾濟弱人
慎勿欺心背其主

題顧秀才藏舟中看月圖

放船晚作南湖遊一葫蘆酒當船頭白雲翩衣紫霞帔

松風吹髮寒飈飈少焉月出景零亂散作百頃玻璃秋
有月復有酒不飲令人愁謫仙在何許空葬青山頭我
家草堂月更好何如返棹歸來休痴人不飲月亦羞素
娥起舞我摘阮對飲豈必論觥籌千載與月同風流

送澧州治中王伯顏征蠻詩

大風吹沙揚飛雲五溪白晝纏妖氛鼎民瀕洞走無路
何人靖難收奇勛捍城惟稱納太守殺賊惟數王將軍
將軍行年未五十上馬揮戈勇無敵島夷振動江水翻

日昃不令走一賊將軍亦是人中雄一日過我淮之東
腰間寶刀血不減提出歛忽生悲風樓船載得詩千首
不羨黃金高北斗刻向武林山上頭詩與英名同不朽

從軍曲

征馬蕭蕭車漉漉年少兒郎新結束廟前無酒發行裝
山路崎嶇行未熟生來不識征戰塵驕馬轉鞍車折軸
徘徊相顧奈爾何丞相令嚴風火速妻子歸來哭倚門
今夜闕君月中宿

謝雪坡送饒介之鱸魚介之有歌索次其韻

松江之鱸長似人網罟未敢傷其鱗今年八月欲上市
謝侯先得江之津筠簋息脚走相送侑以菊露之清醇
魯陰先生不得喫隔屋大叫呼西隣庖丁迎笑老饕喜
汲井洗出色勝銀篩香搗辣給饗婦去頭截尾娛衆賓
吾儕醉飽謝侯德此樂何啻千萬緡吳王鱸殘眇何許
闔閭城外猶風塵太羹玄酒久寂莫世間滋味元非真
先生欲眠客且去勿論張翰爭羹蓴

奉書岳忠武王詩集傳後

班師歸來淚如雨洒向北邙陵上土金杯不共半杯來
旌旆已入黃龍府姦秦柄國奈若何世上英雄本無主
誰人肯道莫須無嗟爾張公作何語一朝行殿受封功
錫宴湖山看歌舞兩宮萬里尚龍沙泉下臣飛心獨苦
臣家有子罪萬死臣心有血一斗許君王還肯北征時
留釁中軍帳前鼓大河落日又風塵撫卷令人哭忠武
馬國瑞所題李龍眠畫赤黑二馬相戲卷子一

軸索余題詩因題卷後

君不見項王烏騅如黑龍蹴踏萬里烟塵空五年乘之
勇無敵七十二戰收奇功又不見白門赤兔來向東神
物終屬雲長公百萬軍中刺名將疾如健鶻追秋風龍
眠居士親貌得毛色意態將無同沙場無人白日靜平
陂淺草青茸茸雙蹄直立如變化兩尾突起爭豪雄還
君此圖三歎息此馬忽去難再得江南異事人未知又
見麒麟出東壁

題笠澤金伯祥橫山墓所之瞻雲軒

踞湖之上幾千尺下有滄波通笠澤百年華屋與荒邱
兩地相望淚沾臆親歿知幾年抱痛如一日孤雲飛處
最關情漠漠愁魂招不得魂之來兮雲下垂月落分明
見顏色魂之去兮雲亦空歛忽消沈竟無迹悠悠飛去
復飛來孝子之心豈終極我家揚州好墓田老作江南
未歸客天涯芳草又春深夢裡還家作寒食

題張天民荆南精舍

溪有蛟兮山有虎欲往從之道應阻崩雲墮地猿攬愁
腥風吹衣髑髏語花開靜樹自為春木落深林响如雨
斬蛟烈士呼不聞騎驢老人去何許溪山良是村郭非
撫卷茫然心獨苦日月徒為晝夜賓江山本是興亡主
先生歲晚早歸來還使居民有環堵

謝馮仁伯惠雙雞

可人送我雙鷄雞五色毛羽生方齊下堂呼兒解其縛
意欲飛上茅簷棲山家得雞如得鳳寧與野雉論高低

吾將洗鼎試靈藥白晝聽爾雲間啼

六合郭節之聽琴詩卷

天下幾人彈古琴愛之不惜千黃金春雷上天霹靂死
至今古調空消沉金徽玉軫久寂莫斷文剝落塵埃侵
鍾期一去不復返况迺四海無知音松風泠泠白日靜
山水定以娛冲襟無弦之趣世莫識悠悠千載淵明心
古人今人若流水善聽善彈能有幾六峯隱者吾故人
得天下名亦琴耳

槎山歌為胡雲夫作廣西憲史雲夫家于德安
之槎山累世矣至正十二年秋中臺計事回
至廣陵聞漢上兵後山居亦蕩然已慨然思
親而不可歸馮太守書槎山二字為贈朝夕
展玩姑慰其心因題卷後

淮水出自桐柏山東流入海何時還胡君引水種林木
築室正在槎山間槎山清空白日靜胡君意與雲俱閒
漢東一夕風塵起雲亦高飛幾千里山間有家不得歸

却過揚州飲淮水飲之為洗冰雪腸今我不樂思故鄉
驅車明發渡遠道廣海又在天一方思親恨不歸來早
夢中祇說槎山好他年歸隱奉親歡白頭同向槎山老

劉商觀奕圖

茅生絕藝天下無何以刻此觀奕圖劉商見之亦驚倒
神妙似與龍眠俱松陰對奕者誰子豈非角里園公乎
雲綃霧縠古冠佩童顏雪項滄溟枯野樵旁立太癡絕
歸來始覺仙凡殊斧柯竟化作塵土世間甲子真須臾

老夫只解飲醇酒一着輸贏曾放手市廛有地寄閒身
却覓南山橘中叟

題墨梅卷子

千年老枝生鐵色雪魄冰魂誰貌得三生石上見逋仙
獨鶴歸來楚雲黑何郎垂老客揚州花前勸酒仍風流
江城吹笛月未落夢回一夜生春愁

題蘓昌齡畫秋江送別圖贈湘中江可翁

白沙江頭水楊樹正是秋風送君處海門日出潮欲平

把酒娛君君不住楊公廟前聞鼓聲多少行人此中去
江子于今空復情干戈滿地兵縱橫丹楓葉墮山鬼嘯
黃竹叢薄饑魑鳴湘中有家不得往時對此圖雙眼明

李長卿遂樂軒

遂樂之軒何所遂我識軒中主人意十年江海早歸來
願受城南一廛地男婚女嫁及此時婢織奴畊供卒歲
閉門不出心自怡阿孫撰杖行相隨綠陰無塵白日靜
饑飽捫腹看花娛游魚在藻弄清泚好鳥當戶鳴高枝

幾人適意有如此樂乎天命復奚疑

宋君瑞存恕堂

故家獨見宋先世文采風流一儒素向來松雪寫如心
題在南堂樂居處門前求藥日紛紛或有無錢亦持去
子孫傳之將百年積券如山不知數君為郡馬幾葉孫
復戒諸郎祇存恕九街正爾黃塵深杯酒對面干戈侵
營營苟苟者誰子一毫奚啻爭千金傍人笑問爾何以
平生苦自如吾心還君此卷三歎息坐隅自寫為規箴

沽酒行

街頭酒貴不可沽，渴吻甚欲吞江湖。
手持青錢宛若畫，家僮走遍東西衢。
南橋沽來不滿斗，就坊買得烏雞雛。
烹雞開酒忍獨酌，可人好客難招呼。
今宵醉飽坐復醒，燈前不用兒孫扶。

兵部危太樸郎中家於臨川雲林山上，請方方壺作雲林圖太樸索詩賦此。

宇宙有此雲林山，三十六峯如髻鬟。
雲林先生讀書處。

長松芝草非人間白雲裁衣亦自足青精製飯何曾慳
朝光空濛起舒眺人跡迥絕窮躋攀青天蕩蕩海月出
照見先生冰雪顏惟有方壺契幽眇貌得彷彿來塵寰
宮中聖人正問道布衣召入蓬萊班玉堂給札縱揮洒
金櫃啓鑰煩修刪於今聽履上霄漢聖人未放先生還
山中喪亂復何有飛瀑落澗空潺湲青林鳥啼野花發
白晝虎嘯松風閒朝廷宴坐見圖畫亦應懷我雙佩環
方壺生在哪處胡不同來玉京住魚龍夜落河漢秋却

泛靈槎共歸去

二月二十日同李希顏遊范文正公義莊登天

平靈巖山希顏有詩因次韻

闔閭城外草芊芊桃花杏花紅爛然物華兩岸眼零亂
畫船春水如登天棹歌却轉橫塘去山寺鍾聲日將暮
長松夾徑風冷冷曾是先賢舊行路老禪蔬食作清供
留宿白雲最深處瓣香復拜忠烈祠卮酒誰澆洛陽墓
清談朝士亦東來白髮野翁猶北至曉乘竹轎度羊腸

地豁川平還散步
蘄王墳上無紙錢
却讀殘碑不成句
一羣山鳥自驚飛
無數野花空媚嫵
此中俯仰二十年
一廢一興皆可舉
濡毫拂石重題名
搔首臨風謾懷古
人生身後可奈何
欲乞南峯一坏土
山靈有意肯相容
書券便當酬地主

夜泊陳店舟中寫懷兼柬雲林高士時張孟膚

同舟

葑門曉發吳淞船
手把傳符津吏前
五年別家走未已

素髮蕭蕭垂兩肩小龍江頭舊遊處東家西家爭招延
匆匆會散等過鳥風吹湖水春無邊雲林高士獨不見
倚篷四望心茫然驚湍疊浪豈作惡渚花江草仍爭妍
夕陽收港泊陳店入市買魚燒荻鞭蓉城公子今最賢
賦詩行酒能周旋一談一笑燭欲盡野戍不聞鍾鼓傳
却憶山中小兒女如此明月應未眠

醉樵歌

朝亦不採薪暮亦不採薪蓮涇賒得沽酒家入口滑辣

香且醇一飲三百錢再飲五十文興來連欲醉不得一
醉已判三千春狂歌還容木客和大叫豈怕隣翁嗔生
來無田種秫米亂後有地披荆榛山花野草插滿笠兒
曹錯闕芻蕘民王質不飲酒也是癡仙人爛柯山在何
許一局殘碁自今古當壚主人休索錢酒債尋常何足
數醒來隨處束薪歸却賣青錢送還汝

和楊孟載春愁詩原韻錄寄楊鐵崖

小牕病酒厭厭卧春色三分二分過仙人謾織藕絲長

金銅難補菱花破
花間蛺蝶已雙飛
葉底青梅纔一個
綵筆題詩人未歸
愁腸一似車輪大

長江送別圖題送周平叔之通州丞

福山蒼蒼倚天碧
狼山巉巖生鐵色
兩山當江作海門
力盡神鞭驅不得
滄波萬里從西來
楚尾吳頭天一壁
陰風轉地鯨怒翻
黑霧連空龍起立
來舟去楫不敢動
袖手傍觀唯歎息
扶桑浴日飛上天
百怪潛消杳無迹
水光鏡淨山亦佳
目送雲帆高百尺
青霄要路君既官

白首窮途我猶客
烟中隱隱見孤城
令我思鄉心轉劇
驪駒歌罷將奈何
倚杖江南望江北

張士先雙桂堂

淮南叢桂天下無
張侯堂前生兩株
清陰嘗棲白顧兔
樛枝並立青珊瑚
侯也生兒有如此
丹鳳之雛驥之子
素衣老仙天上來
搗熟玄霜先贈爾

古詩五言

題賀畊叟晚香亭

陶翁本愛菊屈子亦餐英兩賢天壤間千古清風清翁
乎飲輒醉子也空獨醒何如賀狂客不羨身後名中州
有沃壤喪亂不得畊種菊數十本得酒還自傾自歌仍
自和烏烏作商聲陶然有餘樂聊復全此生

賦得龍門恭送張德常同知之嘉定任

來龍起西北萬古壯此門日月互開闔風雲恒吐吞龍
來海欲立龍去天為昏至今兩絕壁上有波濤痕張公
東海客邀我坐石根仰瞻泰宇淨俯瞰靈闕渾神物固

莫測目擊道乃存歲旱當用汝霖雨清乾坤

儀真向有館驛久廢船馬俱無使客不便省委
宣使梁克誠振治一新粲然可觀諸公有詩
題贈因題卷後

昔游鑾江城曾過鑾江驛庭廡閒無人蕭然草盈尺饑
鳥噪前楹羸馬卧空櫪迺知江南民於焉久當役傳吏
苦誅求日夜星火急使者既旁午筆楚復交集省城若
有憂選官為蘇息梁君英妙年力可事繁劇朝迎南臺

官暮送北省客高馬馳若星大舸密如織宿弊一洗清
長才世難得和氣回閭閻光華照原隰老夫作此歌奚
足頌其德豈無觀風者傳之上京國駕言當趨裝秋霄
起雲翮

雜興三首

野蔓被長坂秋花翳前林登高望孤冢涼露忽已深團
團日東出瞬息還西沈吾親不可見哀涕沾衣襟徘徊
未忍去玄雲生夕陰

遙遙烟中城旗幟互明滅大風揚飛雲悲笳隱空堞獨
行臨大河足力稍衰歇褰衣欲涉之水深不可涉吾生
將焉歸誰與作舟楫

夜坐竹林下仰視天茫茫浮雲起西北衆星黯無光群
鳥昧靈性胡為思南翔良辰忽變易志士徒悲傷願爾
保素節何勞怨清商

賦樗杜之詩一首送大歲大徹二位上人歸日
本國樗杜之上人自號也

東海有樗木託根扶桑邊扶桑不汝棄屈曲枝相連上
拂火龍馭下陰神鼇淵念彼擁腫物豈無人所憐歲公
見之喜日夕相周旋手執天地爐巢居在其顛朝持祕
密呪夜坐清淨禪我欲從子去一笑三千年

居竹軒詩卷一

欽定四庫全書

居竹軒詩集卷二

元 成廷珪 撰

律詩五言

上丞相多爾濟國王

浙江省

太祖開中國元臣起朔方八荒歸版籍千載際明良
奕世兼茅土聞孫列廟堂白麻新命相紫誥舊封王
鏤玉為符契鎔金作印章既徵扶社稷仍賚理陰陽
遼海風塵靜梁園草木芳精忠存北闕化澤被南荒
翠織龍衣

密黃封蜜酒香三吳歌盛美百辟仰輝光士已歌麟趾
人爭覩鳳凰小儒狂斐在有頌繼甘棠

瑞麟圖至正己丑夏五月麟出泰興縣張村村

民筆死之縣尹馮君寫為圖請以賦之

麟也嗟如此天乎涕獨零江間消間氣天上失機星異
瑞遵三代嘉祥冠四靈拳拳宛馬足彷彿野麇形高塚
雲猶白空林草自青無由歌一角宜爾壽千齡同本時
方驗歸和世未聽東川唐故事西狩魯遺經謾託犁牛

子虛期紫鳳翎美茲賢令尹見此古儀形畫擬功臣閣
書歸太史銘觀風有使者還與上明廷

題劉孝子傳後泰州海陵縣劉子彬性孝友與
諸弟隱居讀書畊以為養曲盡其道親喪塋
葬有異色蛇見又產連理木人以為孝感狀
元陳祖仁記其事司業江存禮因作劉孝子
傳為題其後

好在劉真士家居海上村義風今益振德望老逾尊譙

國讀書裔吳陵孝友門白頭共子職粉骨戀親恩養志
兼甘旨承歡適清溫難兄復難弟賢子更賢孫聯綵香
凝席鳴壠酒滿樽秋田分黍稷曉柵散雞豚忽抱終天
恨同招九地魂苦茨忘夜寢飭粥廢朝飧手澤疑如在
音容儼若存斷雲丹旆遠良夜漆燈昏畚鍤隨傭作衣
裳積泪痕異蛇成五色嘉樹托孤根活水流芳澤新塋
啟慶源已終喪次禮猶奉夢中言善行能相感鄉評未
易論名應動冠冕心不愧乾坤芝草秋猶盛荆花晚更

繁門閭待旌表會見薄夫敦

奉題李秋谷平章存日寄其叔父李同知安書

後兼叙其實

秋谷文章在清風四十年先朝真宰相平地舊神仙逸
氣雲霄上榮光雨露邊印章封一品楮幣賜三千憂國
惟心切匡時見節全回咨還內藏知足契皇天憶自攀
龍去曾如抱虎眠過家期上塚謝病請歸田季父何時
會安書遠道傳喜看親族貴仍願弟兄賢妙畫何森若

真情亦靄然封緘題日月光彩照山川未數甘棠笏宜
書汗竹編子孫須寶秘什襲永縣縣

王彥芳御史所居之堂曰繡榮諸公詩題卷末
上國疏恩重中臺拜命初兩朝司內府十載奉宸居甫
歷叅謀選俄膺御史除天機織文綺月姊繡華裾獬豸
冠偏稱麒麟錦不如羽標金鷲鷲花隱玉芙蓉六轡青
驄馬雙輪白鷺車胷蟠五色線腹藁萬言書被服身何
忝彌縫志必攄芬芳沅簡冊光彩照門閭退戶香烟裊

垂簾化日舒小山蹲怪石活水灌清渠
昆季年皆妙公卿駕不虛謾誇貂作帽
寧羨豹為祛庭訓言猶在鄉情禮未踈
每蒙招宴集詎肯棄樵漁鵲結慚無褐
蝸藏僅有廬深期換朝服紫帶映金魚

賦長律二十二韵題吳江郭州判索送謝太守
詩卷

持節吳江日分符檇李辰雙螭交赤幟
五馬挾朱輪凍雨連清道靈風動洒塵
字民親若子破敵捷如神水寺

題詩遍田家問俗頻鶯花茗雪曉烟樹洞庭春是處歌
龔遂連城借寇恂湖山當大郡封壤接比隣在昔京都
富於今府庫貧三苗空掠地百粵阻通津赤縣傷凋瘵
蒼生受苦辛髓枯膚未剝病亟氣難伸畫省持衡鑑烏
臺列縉紳談兵猶辯士獻策尚從人間世才難得如公
孰與倫撫時先愷悌起廢莫因循城築工尤大田毛賦
必均燼餘驅瓦礫兵後翦荆榛惠化仍多舉禎祥或可
臻鑄錢資國費賑粟散倉陳和氣隨天轉輿情與日新

斐章書令德史筆待詞臣

故湖州路同知中憲郃公子敬挽章

昔日趨烏府君年正黑頭家承今閥閱世出古諸侯夙
有登車志仍多為國謀濬湖陳上策平寇借前籌澤國
波瀾息蠻江霧雨收遙知鷹隼擊曾與鳳凰遊跋涉三
千里勤勞五十秋臺評通北闕士論溢南州廣海綏南
服湘潭控上游三司勞贊畫兩縣起歌謳別駕恩初下
朝堂禮更優上書纔告老拂袖即歸休樂矣陶潛酒飄

然范蠡舟春田茗水近夏屋升山幽潔以蘭為佩輕堪
竹作兜兒官從此大孫孝復何憂一日音容隔羣公涕
泗流西軒情脉脉東勝夢悠悠芝室人千古花蹊土一
坏明公發潛德勒石表林邱

題郭行簡照磨所有具慶堂詩十六韻

上國疏恩重高堂衍慶新世當清化日家有白頭親綺
席團圞處朱門富貴春兒孫紛滿眼夫婦敬如賓偕老
期千載生年並八旬閭儀仍肅肅庭訓尚諄諄食舉齊

眉案花簪折角巾賢郎登仕版碩德動朝紳盛事諧占
鳳佳辰紀紱麟同稱壽觴滿聯舞綵衣頻斲雪供青笋
開冰出錦鱗孝心應盡力祿養必殊倫自古稱三樂於
今復幾人芬芳流簡冊光彩照鄉鄰京兆看前輩汾陽
恐後身明年兩封爵頌誥下楓宸

送郭仲安貢察院

棒檄上京華清才素共誇封章不起草健筆自生花燕
市千金馬天河八月槎看君冠獬豸好為觸姦邪

登多景樓懷唯心上人

憑高望不極多景復多愁落日隨天轉空江入海流漁
樵何處老兵甲幾時休却憶唯心叟題詩在上頭

六月八日

世事今如此吾生可奈何海東仍盜賊潁上復干戈苦
雨朝逾急陰風夜轉多白頭無關策對酒獨悲歌

送潘仲明醫諭之泰興

舟行三百里直到縣門前不請居官俸多收賣藥錢年

豐沙米賤江近網魚鮮莫起歸來興於今令尹賢

劉莊

劉莊久不到草樹鬱蒼蒼野艇買瓜果村坊羅酒漿
水生沙井淺潮上鹵田荒時共西清老登高望夕陽

曉出錢塘門

出門聊適意草樹碧紛紛一雨破清曉四山生白雲
僧樓緣嶺出樵徑過橋分明日重攜酒來澆和靖墳

齋居

曉起坐終日無人扣竹扉
柿因風落早菊為雨開遲
稚子能賒酒隣翁許借詩
白頭無別計空負聖明時

登望江亭

長江不可極岸幘獨登臨
潮信自朝暮山光無古今
碑亭流水涸輦路積苔深
欲寫興亡恨西風萬葉吟

寄吳寅甫

山館殘花歇江樓暮雨餘
長歌留客和短札倩人書
露葉懸青蔓風簾隱碧梧
夫君隔河漢涼夜月生初

寄慈溪普天澤監懸

聞說慈溪縣官閑地更偏兩潮來海錯六月刈山田曉
塔天童寺春帆日本船何時瓊樹底花夕醉嬋娟

秋夜雜詠三首

對酒不能飲燈前笑又悲轉頭都覺謬對面莫相疑白
髮無休日青天有壞時微酣且熟寐一任老夫痴

平居在城市無夢傍江湖世事有今日生年猶故吾檢
書逢越絕引曲感吳趨隣叟邀皆醉歸來不用扶

世俗今多事人心此一時風塵吾道在江海我生悲白
日終難繫青山不可移吾方飲吾酒君自着君棊

賦林泉民

羣居傍城郭獨汝向林泉亂世知誰在荒村只自憐白
雲棲晚樹流水界秋田亦有催租吏敲門橫索錢

和謝雪坡太守東阡道中二首

上相深求治明公獨愛民三江不用武兩郡且行春隴
麥連村好池秧得雨頻數州飄泊者來此避風塵

淮楚紛紛際誰憐老逸民一為吳郡客三見洞庭春
世路間關久侯門接納頻麻衣猶似雪不敢浣縑塵

龐山湖泛舟過甯伯讓庄所

湖上足清晝雨餘生綠陰扁舟到城近曲港入村深
野叟頻相問郎君不可尋西菴肯分席吾亦老山林

寄愚隱智東堂

落日太湖上歸舟又磧沙百年同是客兩寺即為家
老竹仍多笋枯藤也自花何時結茅屋相伴老烟霞

垂虹亭晚坐

長橋戎馬後旂幟尚紛紛吳越東西隔江湖左右分荒
哉皮學士去矣范將軍誰種千頭橘空山卧白雲

送陶教授

亂世兵猶滿崇文禮自寬青雲總朝士白髮且儒冠昔
荷先迎日皐比不受寒婁江足雙鯉好好寄平安

舟中晝寢

蓬牕坐春雨偏與睡相宜襪被支頭穩茶甌破夢遲昔

年為客慣今日覺吾哀無限滄洲意令人有所思

送葉以誠歸金華

亂世兵雖滿吾儒氣自伸黃金贈說客白璧聘從人念
子真才俊嗟余豈隱淪向來稽古學留以奉君親

題慶雲東竹水居

水光當戶白竹色上衣青風露涵虛室江湖入淨瓶林
梢閑挂錫月影靜翻經止觀何聞見秋聲出杳冥

秋日遊虎邱逢徑山元上人

黃葉樹層層茲遊記昔曾到山疑是夢出寺忽逢僧短
簿荒祠酒生公舊塔燈留詩駭浮俗山鬼也多能

寄安國長老慈雲谷

慈公卓錫處臺殿舊經行惡竹何多俗孤松只自清步
回春雨作定起夜潮生我亦逃禪者山林老弟兄

以張仲舉韻送毅景中任長蘆寺二載詩就答
仲舉

被旨辭京闕還家復遠途行吟頭戴笠趺坐膝穿蘆佛

國傳宗鏡王門得視珠西來祖師意先爾設伊蒲
吾亦憐吾竹蕭然只數竿多生遺病俗獨汝覺心安五
月秋聲早千山雨氣寒裁詩謝張祜歲晚好看

送李斯立

南國風塵滿西江道路難鄉人問家信津吏識儒冠短
髮何由黑孤心只自丹放歌聊縱酒努力且加餐

次韻雪詩

閉門三日雪竹外轉蕭然夜色侵書幌春寒壓篆烟詩

題名彥後酒讓老夫先一箇表高士風流五百年

夜過吳江宿於聖壽中復中行方丈

深夜扣禪扃天寒月在庭鳥驚棲後樹僧掩讀殘經蔓
草風吹白枇杷雪洗青對床聽法語心孔愈惺惺

登靈巖山

木杪見浮圖盤盤一徑迂倚巖留客坐過嶺倩人扶野
色平如削湖光澹欲無殘碑不可讀春草沒雙趺

送澄上人遊浙東

浙水東邊寺禪房處處佳千崖無虎豹二月已鶯花曉
飯天童笋春泉雪竇茶煩詢夢堂叟面壁幾年華

浙水西邊寺天寒子獨經雪山當戶白雲樹入湖青虎
跡泉頭見猿聲石上聽俊公中立坐煩爾候禪局

向遊武林之龍井過南天竺登二老亭曾賦二
詩

二老題詩處風流不再逢客歸黃葉雨僧住白蓮峯誰
謂山無鳳人傳井有龍白頭江海上今夕寄行蹤

三月二十五日過上洋十六保徐居士柯莊二

首

野水明春色晴沙帶汐痕朱樓黃鳥日青草白鷺村野
老能分席官軍不到門毋煩問漁艇即此是桃源

趁潮深入港風急水西流沙潤輕沾屐橋低欲碍舟孤
花餘晚艷芳草亂春愁沙鳥應相笑衰年尚遠遊

四月十三離上洋回華亭

垂老重來此臨分即惘然雲吞隔浦樹潮打送風船卜

築虛求地行藏欲問天
淮南兵革後荒却種瓜田

律詩七言

送張可道赴嘉定府太守

秦中百二漢關河
曾見乘驄舊所過
棧道地形天下險
嘉州風物古來多
分符又叶三刀夢
入境先聞五袴歌
父老扶筇親引導
將軍負弩疾撝訶
錦袍錯落金為帶
白馬連翩玉作珂
興學固常崇俎豆
防邊還為戢干戈
四川畫省勞詢問
一郡蒼生望撫摩
樓倚青溟來萬景

山橫紫翠接三峨題書別館魚堪寄退食公堂雀可羅
西蜀考功當第一他山有石為君磨

題周伯溫待制為蘇老人篆七十古來稀

天上詞臣小篆書方今端合比瓊琚肯將南極仙人壽
題向東牕隱者居玉屑露凝金錯落錦茵春暖繡芙蓉
纏腰信有揚州鶴垂釣寧無渭水魚方士曾分燒藥火
諸孫親御看茶車黃金意氣留賓客白髮風神照里閭
世上虛名皆寄爾人生此樂復何如芝蘭香裡渾如畫

百歲傳家慶有餘

贈六合縣宣差伯士寧因兵亂於滁泗之間獨
縣境肅然作詩以叙其實

風塵千里暗淮堧六合孤城獨晏然保障正符明主意
歌謠爭頌長官賢公庭吏散門如水驛館賓來酒似川
䟽水為湟成重地返風滅火動皇天軍需會計多雄畧
兵衛森羅總少年興學未聞忘俎豆防邊仍見戢戈鋌
編民闢地增輸賦遠客移家願受廛封壤遼連瓜步外

妖氛不到瓦梁邊
魚鹽山市宵鳴柝
米麥江橋曉泊船
十邑自今稱第一
前程誰謂隔三千
王綱政爾關明教
民瘼何人解倒懸
輿論已傳霄漢上
豐碑立在縣衙前

送王君寶僉憲調河南道

廣陵城下送軺車
賤子無由奉尺書
南嶠幾年仍盜賊
中原千里半邱墟
天開豈少追風騎
人海猶多漏網魚
素有澄清天下計
更須抗疏動乘輿

寄芊希曾

白髮鏡中添幾莖江空歲晚可憐生千金有人市馬骨
一飯何處無魚羹東家娶嬾夜宴客北里送子春朝京
年當五十不得意目送飛鴻生遠情

道士胡道元常以一舟往來洪之東湖其自扁
有曰活死人窩為賦此

一住行窩幾百年蓬頭長日走如顛海棠亭下重陽子
蓮葉舟中太乙仙無物可離虛殼外有人能悟未生前
出門一笑無拘碍雲在東湖月在天

贈數學王隱居

青囊曾閱五行書，客亦還知此理無。
太古以前無甲子，先天之後有堯夫。
鳥官當日纔司歷，龍馬於今又出圖。
餘子未能通許事，黃金只可說榮枯。

題赤壁圖

赤壁磯頭禿鬢翁，興來攜酒泛秋風。
偶論水月盈虛際，併入江山感慨中。
華髮多情傷老大，皇天無地着英雄。
神遊八極知何許，良夜應騎一鶴東。

感而作為時中生忌

夢遶南岡北嶺雲一杯無計洒松筠世間我豈長貧者
地下君為不死人夜雨自荒張祜宅秋風誰障庾公塵
於今友道俱凋喪落日江湖泪滿巾

八月十六日送張仲舉至秦郵驛是夕邵文卿
置酒雲峯臺望月二首

水驛官船晚未開月明乘興且歸臺揚州鶴怨山人去
甓社珠迎國士來千里何時重命駕百年今夕此銜杯

同君盡醉交遊地為問秦郎安在哉

雲峯臺上今宵月奇絕平生此一行天水光搖秋萬頃
星河涼轉夜三更謫仙被酒騎鯨去游女吹簫學鳳鳴
明發星槎上河漢定傳詩話到蓬瀛

海上即事

范時港頭生事微三月海上行人稀東沙西沙海不熟
大信小信舟當歸護巢野鵲並枝立得食水禽何處飛
無魚換酒亦謾爾只恐丁男荒釣磯

送解伯中赴史館召至正癸未朝廷以史事遣
使起河東張先生於廣陵明年史局開又於
廣陵徵解先生廣陵連有二盛事覩茲榮美
賦詩為別

海岳澄清又百年前朝陳迹散雲烟恭聞天上修三史
連向淮南起二賢青簡旁搜成大典黃華迭出購遺編
先生善用春秋法宣下當時太史遷

送陳景川歸盱眙

第一山中風物殊我欲買田來卜居風林把酒聽黃鳥
雪港掛罾分白魚富貴不來吾老矣漁樵有約子何如
可能久作終焉計北海能修薦鶚書

虎溪三笑圖

三老風流笑口開山中猿鶴亦驚猜攢眉入社謾多事
送客過溪能幾迴僧影欲隨秋水去虎聲偏傍石橋來
東林絕響今千載撫卷題詩愧乏才

張仲舉助教

三寄新詩竹下來多君高興憶東淮塵埃沒馬昏歸舍
風雨聽雞曉入齋此日陽城須諫議當時方朔謾詼諧
曼曼花底相思夜酒滿春城月滿街

寄拔實尚書

憶陪冠蓋集通津下士無由拜後塵曾和淮南招隱曲
得從天上謫仙人鵷鸞在列誰堪並鴈鵠高飛不可馴
遙想退朝香滿袖題詩還記竹軒春

送李子威赴國子監時康魯瞻亦除監司業

曾占龍頭第一名先生元是監諸生樓船近向淮南發
驛騎虛從潁上迎宣室幾年無賈誼諫垣今日有陽城
同寅更得同年者同振斯文答聖明

二月十一日祭長男之墓

三歲女孫方學行牽衣隨母上新墳青春過眼少晴色
白髮向人唯哭聲醉裡狂歌聊自適夢中相見只如生
他年何處藏吾骨不盡人間父子情

寄烏古孫幹卿叅議

紫宸奏對出班行
畫省論思晝漏長
三月不知燒笋味
一春還憶煮茶香
幾人白髮黃花酒
何處青山綠野堂
扶植皇綱在今日
中原草木仰輝光

上清盧道士所藏雙龍圖

仙潭烟霧晚冥冥
彷彿飛空劍氣腥
巖穴幾年當蛻骨
畫圖今日露真形
天瓢水淺陰猶伏
寶藏雲深夜不扃
好就盧敖聽闕使
八方行雨鼓風霆

夜思

斗帳方床一布衾睡餘推枕復長吟青燈細雨三更夢
白首殘編萬古心天上不知何歲月城中誰信有山林
哀歌坐待東方白短髮刁騷不滿簪

環碧齋

面面溪光護石苔軒墀無復有塵埃月涵虛白浮秋去
水泛空青入座來漁釣兒孫多質樸嘯歌鷗鷺不驚猜
我家亦住滄江曲千箇簷簷遶舍栽

蕭萬戶野鶴卷子

肯著邊塵浣縞衣當時城郭是耶非
自離碧海三山去直過青城萬里飛
老去揚州空逸興何人沙苑脫危機
丈夫功在麒麟閣莫說仙家有令威

送謝芝甫山南憲

謝庭子弟多佳士荆國山川總勝遊
萬里捧書催入幕一朝撾鼓發行舟
玄猿啼處巴江夜白鴈來時楚甸秋
襄漢風流千古意為君長憶仲宣樓

和孟景章秋雨見寄

十日空齋風雨陰閉門唯計作詩淫屋茅新補一重厚
池水又添三尺深爨下家童耽熟睡燈前山鬼聽哀吟
知君翦燭方酣飲肯信幽人獨苦心

東句曲外史張伯雨

霞佩翩翩出洞天當時彷彿見癯仙幾年南國張公子
今日西湖葛稚川滄海塵飛丹已熟玉堂人去榻空懸
林間載酒來相覓乞寫仙經與世傳

送幹克莊僉憲調淮西道

繡斧煌煌擁使軺才名奕奕在中朝
甘泉詞客河東賦蓬島仙人海上樵
風振紫山迎驛騎雲開金斗見秋雕
澄清事業須公等桂樹淮南未易招

贈松江知事唐景友三月二十八日同茅子剛
府判郭宗唐推官同日上官

三月雲間同上日理官判府總英髦香風又動紅蓮幕
雨氣微侵白苧袍刺史燕居邀論事掾郎鵠立看揮毫
哀翁亦是淮南客拭目青霄望爾曹

送谷君玉赴南臺御史

幾年坐嘯元戎幕一日來簪御史冠已有聲名驚海內
更須風采動朝端星明使節三台近霜落江城六月寒
應救倒懸如水火東南民力正艱難

題王可道同知濯纓亭

脩然無限滄浪意况有幽亭近水安孺子有歌同鼓枻
故人無約共彈冠通宵雲氣侵衣潤六月波光入坐寒
慚愧東華塵土客知誰來此一憑欄

同諸公遊西城木蘭院

三月西城風日好短筇隨意踏晴沙
王孫不識靡蕪草童子來尋枸杞芽
白髮有人中叩酒清泉無火煮春茶
山扉寂寂僧歸晚落盡辛夷一樹花

送陳子山狀元赴太廟署令

天上詞臣錦作裳喜趨清廟奉蒸嘗
寶刀刻頌登彝鼎金硯揮毫撰樂章
太液秋風黃鵠下齋房明月紫芝香
禮成月薦應分胙彩服承恩到北堂

廣陵岳宮醮夜觀王澹淵高士歲事自登瀛橋
而迎師入黃籙壇

濛濛雲氣溼霓旌小隊紅綃鳳螭明鸞鶴舞隨行道影
魚龍出聽步虛聲淮南高士青毛節句曲仙人碧玉笙
一路天風吹不斷此身今夕在蓬瀛

送董運使之江西叅政

煌煌渭節擁麾幢父老曾期鎮此邦合上星辰朝北闕
且攜霖雨過西江侯門何啻朱輪十相業今看白壁雙

嗣見豐碑書盛美玉堂端有筆如扛

送楊士先歸長安

落魄麻衣不受塵黃金揮盡只清貧
新豐市上酒濯足韋曲城南花惱人
豪傑謾嗤秦逐客漁樵能話漢功臣
清時未老丹心在且把長竿釣渭濱

九月十日自壽

余生堪歎復堪憐喜際明時老市廛
把菊已從前一日種桃猶待後千年
但令有子親書帙莫怪無人送酒錢

寡欲清心今得矣煉丹何用學神仙

送王君章掾史侍司衆丞督辦河防竹木還京
方今禹稷際昌期河水橫流適在茲十七萬人重浚日
三千餘歲再清時相君功德邱山重天使聲名草木知
為送大農王掾史小儒歌誦入新詩

送將作同知明齋趣河防竹木事還京

明公端有濟川才百役供需入總裁東海神鞭驅石去
南山材木蔽江來萬年砥柱狂瀾息千里桑麻故道開

昭代君臣同禹稷直將和氣弭天災

賦崧碧為丁貞夫庶使壽

崧高雄真白雲鄉石勢參差面洛陽地湧兩山通上界
天開四岳拱中央丹邱煉藥交龍虎子晉吹笙引鳳凰
自是勲名同不朽千年巖壑有輝光

阮子華所藏桃源圖

桃源流水似天台彷彿三生到此來玉杵玄霜無覓處
金堂玉室為誰開滄州一夜生芳草陰洞千年長綠苔

何必狂人秦甲子漁人祇見兩三迴

題泰州趙子威太守平反王昉冤獄之事是時

趙子威適除翰林待制

昉也銜冤誰與雪明公公議動乾坤狂瀾既倒迴中砥
白日高懸到覆盆一代簡書稱折獄百年冠蓋見高門
承恩又上金鑾去萬歲千秋奉至尊

送羊希曾入江西憲

岸柳汀花幾送迎買舟誰信客囊輕真金百煉色不改

寶瑟再調聲更清直氣猶能唾奸佞苦心寧肯負公卿
間關世道諳應熟終保烏臺好姓名

寄菴詩為余寄菴作

此身江海即蜉蝣小住菴中五百秋萬劫有窮唯道在
八方無礙與天遊虎龍夜合黃金鼎鸞鶴朝飛白玉樓
暫向世間忘爾汝一瓢春酒肯相留

嶽宮登瀛橋

疊石為橋跨兩涯只如平地入烟霞銀河夜擲仙人杖

卷二
碧海橫浮奉使槎
浴水先迎三島日
隔闌遙看十洲花
月中時有簫聲過
多是山頭聖母家

天長縣長伯顏祈雨適見白龍有感

六月天長旱為虐
顏侯夙夜最憂農
丹心貫日迴玄象
赤脚登山起白龍
雷馭電光驚不定
岳靈雲氣出相從
斯民已作商霖望
吉夢何時到九重

題山居圖

石子坡頭松兩株
水光嵐氣護幽居
山翁被酒愛騎馬

溪友放船來捕魚，秋色自隨黃葉老。
野懷常共白雲舒，何時卜築如圖畫。
竹下開軒更讀書。

寄題上清鍾秀樓

鍾秀樓成天下稀，象山弋水相因依。
烟雲顯晦出奇觀，草木動蕩流清輝。
常聞仙人騎鶴至，亦有隱者乘風歸。
吾將從之一攬結，目送秋江鴻雁飛。

瑞雪為劉芝田賦

風卷寒溪漾碧沙，曉來驚見玉橫斜。
人間風日不到處，

天上神仙解種花九地暖迴龍有穴三山雲靜鶴無家
泛舟來覓芝田叟留作山陰勝事誇

寄謝方方壺寫寄遙山古木

鬼谷陰陰苔蘚斑只除猿鶴伴高閒月光或在藤蘿外
劍氣常留水竹間每讀內篇消永日還將生紙寫遙山
衰翁可是無仙骨不得相從共往還

送孫從義憲史貢部

貢名書到拆封開政爾諸曹議選才侍史閣中簾影動

尚書天上履聲來階墀伏謁人皆喜符牒鋪張手自裁
不有雄聲驚畫省可無清論達烏臺

送余廷心翰林應奉

楓葉蕭蕭江已秋吳船三日住揚州
靛花深染青綾被雲葉新裁紫綺裘
征驛馬嘶風滿樹別筵人散月當樓
明年春雁將書去人在蓬瀛第幾洲

畫魚

平生踪跡侶魚蝦
浦月山風滿客槎
曾向春盤登北鮓

更從丙穴薦南嘉
賞花釣得留詩友
折柳穿來覓酒家
萬里江湖清夢遠
於今空對畫中誇

寄謝察院高德進憲史寄來楊友直書居竹軒

三大字

三字封來墨未乾
堂軒舒展對琅玕
高人不待籠鵝換
好客多從載酒看
月夜有懷通白下
秋潮無信寄長干
清臺翠柏應千丈
靜想風霜卷地寒

送李唐臣調山南憲幕

潮落寒汀水欲冰
酌君何惜酒如澠
人憐狗監知司馬
我喜龍門識李膺
爽氣九秋橫楚澤
先聲一日到江陵
君行自厲青雲志
赤鷁終慙九萬鵬

程氏尋樂齋

當時弄月與吟風
一代高人自不同
伊洛源頭無別派
孔顏心上有全功
歲寒只在簞瓢內
春色還歸杖履中
今日看君能到此
不須重問愛蓮翁

夜泊青蒲村

黃葉飄飄秋滿天數家茆屋更翛然溪上老人有識字
村中小兒能駕船薺菜登盤甘似蜜蘆花紐被煖如棉
此中長得無宵警春雨扶犁學種田

河圖精舍

榮河東去幾遷移撫事令人動所思龍馬不來吾已矣
著龜多驗汝知之仙壇作記高千古精舍明經此一時
且向程門求絕學吟風弄月有深期

胡道元隱東湖得許旌陽鉄符延瘞舊名伏蛟

臺道元由廣陵入京賦此以別

許令宮前舊卜隣，鉄符傳得尚如新。
一彈指內三千仞，八百仙中勾幾人。
上界風雲迴羽節，空江雷雨泣蛟神。
淮南他日來相訪，却惜東湖借約塵。

贈談子平者

高人不見說僧判，江海同誰講子平。
能以靜功窺造化，每於先事動公卿。
君從何處得此術，我已多時聞令名。
今夕蓬牕聽清論，流年容與話平生。

藏拙齋

青君抱樸深居處曲几匡床事事幽三穴有謀憐狡兔
一巢無計笑痴鳩白雲生滿溪前面黃葉飛來屋上頭
應是此中藏大巧鳳樓十二要添修

春日遊上方寺因過別業

今日雨晴山亦佳散行聊復寫幽懷田翁入郭買春酒
野衲下堂留午齋老去任添新白髮平生能著幾青鞋
醉中天地堪衾枕卻笑劉伶死便埋

懷方壺高士

塵湖山下足烟霞
羨爾方壺道士家
雨後放龍畊綠野
日中呼犬試丹砂
瓊林一路芝如草
碧澗千年竹有花
正欲相陪此深隱
半盂分我飯胡麻

贈茅山彭鍊師

坐對三峯絕俗緣
羽衣消散即神仙
幾年大洞傳真籙
十日清齋讀內篇
采藥每行青澗底
散花多近白雲邊
精神鍊得如冰雪
妙入羲皇太古先

邱德輔明德齋

方寸纖塵一掃除湛然澄澈只如初本原不昧先天理
功效多從大學書池上倚筇秋水淨月中揮麈夜牕虛
修齊事業須公等我老昏昏總不如

夏日過萬蓬菴

愛汝東菴暑氣薄解衣盤礴坐莓苔一林綠竹盡可數
五月白蓮猶未開捉麈談禪知獨往買魚沽酒待重來
滄江日落山更好且放輕舟緩緩迴

送人歸金壇

滄洲三日北風作海氣冥冥吹去舟游子思親白雲舍
主人贈爾青貂裘沙頭明月為誰好夜半寒潮生客愁
我亦輕裝待明發掛帆撾鼓上揚州

感時傷事寄張仲舉博士

邊報紛紛日轉頻彭城猶未息風塵中原白骨多新鬼
浮世黃金少故人阮籍一生唯縱酒季鷹今日定思蓴
河東鶴叟應相憶落日悲笳泪滿巾

白雲軒為羅氏賦

太行山上思親日
句曲峯前寫興時
千古風流無處覓
一般意味少人知
歸來遠道何堪贈
老去閒心只自怡
悵望碧天還欲暮
令人空擬惠休詩

輓呂州判

七秩高年古亦稀
考之終命見天機
岳陽湖上神仙過
舍衛城中長者歸
門第預題新墓表
几筵猶設舊朝衣
青山埋骨知何處
落日滄江望鶴飛

題上海天妃宮因見王元吉壁間所題詩次韻

二首傷今感昔情見於辭

昔年漕運開洋日御賜香來動杳冥
真籙九朝連晝夜齋厨一月斷葷腥
祠光赤現天妃火雲氣黃占使者星
沉璧麗牲嚴祀典至今神肅在宮庭

何年立廟對滄溟合殿濛濛紫霧冥
香暗水仙毛髮古劍留山鬼髑髏腥
寢樓下瞰扶桑日餉道遙連折木星
聖代祝釐頻遣使徽音不日下宮庭

次李希顏述懷韻

八月邊聲草木寒，愁來短髮不勝冠。
諸公莫誚王夷甫，我輩終慙管幼安。
酒券如山空好客，田毛何日再輸官。
蘭陵溝上松無恙，還有孤猿夜夜看。

登狼山醉題僧壁

白狼山頭僧卓菴，我躡飛履窮幽探。
麻姑又見海清淺，女媧不補天東南。
危枝如龍固矯矯，怪石似虎猶耽耽。
興來題筆寫狂語，此身只合棲雲龕。

題朱伯禮西邨草堂

愛汝西邨之草堂
囂塵不到堂中央
夕陽欲下山更好
大火未流夜已涼
二履也能來戶外
小舟即遣繫籬傍
豈無百榼揚州酒
與子同喫歌滄浪

白雲上人悼章

八十七翁如古佛山房
只共白雲居一闌
東土傳來法
三校西天譯後書
劫火不燒紅舍利
氷池重長碧芙蓉
青城今夜白眉月
似汝招搖出大虛

次俞紹堂見贈詩韻

幽居地僻人稀到，閉戶長歌復短歌。
紅樹也知秋老矣，青山不到客如何。
茫茫天地涼風急，渺渺江湖夜雨多。
淮泗數州消息斷，只除征鴈度關河。

笠澤同倪雲林王伯純飯散過大姚江舟中賦
大姚江頭風乍稀，小陸宅前人獨歸。
霜楓紅於大藥染，沙鳥白似孤雲飛。
持螯把酒一生足，食蛤踞龜千劫非。
雪灘水落獨無恙，肯借老夫為釣磯。

送夏君美憲使出使回浙

三入軍中只布衣至今顏面帶霜威
中原定亂劉琨老南粵稱臣陸賈歸
走也暮年空感慨使乎今日有光輝
乾坤始覺王綱正夜夜星台拱太微

寄馮仁伯

七十老為吳郡客故人不必問餘生
清尊日飲尚一斗黑髮晨梳猶幾莖
藏骨謾思淮上去移家猶望越中行
他年或有相逢地可得同君覩太平

次曹新民感時傷事韻三首

歲晚霜風裂弊裘，
歌談塵一生休。
牽蘿不補山中屋，
挂席將歸海上洲。
月夜拂弦彈白雪，
春朝攜酒看丹邱。
風流誰似曹公子，
華髮不知人世愁。

北僖老作江南客，
撫卷令人百感生。
天下紛紛何足定，
胸中磊磊有時平。
滄江日暎旌旗影，
紫塞風悲鼓角聲。
今日封侯總年少，
老來豪氣謾崢嶸。

客來為說淮南事，
白骨如山草不生。
翻覆幾回雲雨手，

登臨無限古今情長街竟日人烟絕小市通宵鬼火明
欲省先塋歸未得懸河老淚若為傾

蔡大掾迺翁八十壽

蓬萊山下老仙翁却隱吳門水竹中生世幾逢堯甲子
高風不減漢申公繡衣坊裡諸郎貴綠酒尊前一笑同
我亦行年方七十幾時相約問崆峒

過吳江華嚴寺贈斷雲講主

斷雲老僧如斷雲無心舒卷自氤氲空山與之結為侶

遠道也堪持贈君
黑夜雨從龍聽法
青天風引鶴同群
江湖我亦忘機者
半榻今宵喜見分

宿寧境寺

三月江南訪積翁
故人同約向山中
百年刺促何為者
一日高閒不負公
齋閣對床聽夜雨
茶堂趺坐足春風
雪灘借地容吾隱
來往扁舟與子同

王仲沔隱居上虞之東聞航海北山作寄

鑑湖春水暖生波
幾箇歸航載酒過
掩鼻東山將不免

傷心南浦竟如何紛紛白髮交情在耿耿丹心老泪多
安得相從天上去玉堂清夜聽鳴珂

過磧沙延壽寺入游贈毅剛中長老

費家洲上元公塔又見前身示見時舍利放光成五色
牡丹分供作千枝法門總是西來意經藏兼傳古註詩
文筆峯前松樹下甕書藏得待吾師

送韓致用之温州教授

祖帳倒餘雙玉尊
軺書催發五雲門
喜為太府諸侯客

猶是前朝宰相孫講座畫閑書滿屋學田秋熟稻盈村
遙應東壁圖書府遲子抽毫共討論

韓致用夢鶴

疇昔相過赤壁磯神交遺思尚依依應從五色雲中過
還遶三株樹上飛月色滿庭空夜帳露華如雨溼秋衣
蓬萊山下花無數遲子吹簫作伴歸

送智惠隱住水月禪院

放船直到栖禪處萬頃湖心一逕開綠樹鳥驚風落果

碧潭龍去水生苔西巖尊宿傳燈在東海高僧仗錫來
今夜月明清似水太空無地着纖埃

題韓致用五雲書屋次程以文郎中韻

看山不出草堂門門返蕭蕭是白雲
隱几松風生鶴夢卷簾秋水愛鵝羣
坐開句曲仙人酒起讀臨川太史文
後夜柁樓乘月色賀家湖上擬尋君

寧境寺涵碧軒

老衲築軒湖上頭半間曾借數宵留
窻迎紫翠千峰月

簾捲玻璃萬頃秋
別浦暝時迷遠樹
滄洲明處見飛鷗
定回坐待波瀾靜
一點珠光夜不收

題張德長草堂二首

屋下清泉屋上山
獨餘猿鶴伴高閑
仙家只在松蘿外
海月常懸水竹間
社甕今朝村釀熟
隣翁何處棹歌還
華陽真逸時相覓
聞道巖扉夜不關

高人自愛山居好
遶舍清溪帶雪沙
浮玉峯前常作客
句金壇下即為家
仙人未采芝如草
令尹將歸菊有花

他日常良分半席白頭同汝老烟霞

輓卞隱君二首

持盃前日送官航返袂今朝哭寢堂
亂世幾人全白骨他山何處湊黃腸
鐵岡路杳空秋草金鹵亭荒自夕陽
有子歸來印如斗却招魂氣返家鄉

死別那堪屬亂離鄉人聞訃總含悲
家留南國孫何恃路隔中原子未知
石槨衣衾藏夜壑漆燈風雨泣秋帷
西風執紼胥門路無限傷心涕泗垂

寄吳江塔院斷雲講主

華嚴杖室老維摩願力新來示疾多不假鑒王加守護
母煩天女問云何空花境界離諸妄珙梵音聲散百魔
海印堂中獅子座尚容叅請重相過

寄申屠子迪僉憲

先生舊德在甘棠故老爭留住草堂湖上月明鷗鷺熟
山中雨過薜薇香數莖白髮終難變一日丹表不可忘
出處獨翁全大節千年青史有輝光

馮安道提舉輓章

白髮交遊共七旬
翩然長逝獨傷神
中原朝士無多傳
太學諸生復幾人
舊業已荒吳郡宅
新阡還與范公隣
伊誰傑筆書潛德
一束生芻泪滿巾

簡張天民

令子已為吳縣尹
先生猶是葛天民
春秋七十又八歲
江海百年能幾人
多士問奇加束脯
諸孫供饌砍鮮鱗
荆溪舊業知無恙
白鶴時來送喜頻

寄崔宗文

白髮無家七十翁，一枝竹節尚西東。
不因避地來吳下，正愛看山入剡中。
臺閣故人書信少，江湖狂客酒船空。
老懷無限平生意，清話何時一夕同。

寄王左丞

錫谷三山霖雨開，籌邊須仗濟時才。
行兵暗與孫吳合，論道多從董賈來。
太府上功金作印，高堂稱壽玉為杯。
將星夜夜明如月，獨向中天拱上台。

吳江華嚴寺西軒洗竹因賦詩一首

華嚴寺裡斷雲師許我來題洗竹詩
未論竿頭能進步
且教節外莫生枝
定回獨夜秋聲減
經罷西軒暝色遲
從此一塵無染著
歲寒唯有此君知

春日同王仲遠偕遊松林湖之上西望洞庭東
西兩山是日寒食有感

湖上春來數往還
亂中寧放老夫閒
一百五日又寒食
七十二峯非故山
行李只留詩卷在
落花應怪酒盃慳

竹西拜掃知何日目斷歸鴻夕照間

戊戌年避地吳門九日感懷

行年七十猶為客何處江湖着老夫
黑髮空存數莖在黃花也笑一錢無
家徒活計如鳩拙病起形容似鶴癯
獨把茱萸仍獨酌酒酣不用阿孫扶

寄謝太守

君侯夙夜愛民心
檇李重開頌好音
兵後州人無菜色
亂餘廳事有棠陰
熊轡按部兵車息
燕寢凝香畫戟深

走也門牆老賓客尚哦雲月在山林

河南陸思顏兩舉不第隱於南潯以醫卜治生

作詩贈之

長歌放浪江湖上一箇青囊肘後懸但見王門多將相
焉知市井有神仙折箸獨出先天後用藥誰從未病前
自笑區區無一技哦詩乞米度衰年

寄山陰天章寺靜默堂長老

昨日相從訪了翁妙高臺上數宵同十年祇在分陰裡

萬法都歸一點中揚子江山仍落照越王城郭又西風
阿師說法天章上開遍人間色與空

贈李左丞

手分雲漢下天津一洗江淮戰伐塵紫氣獨行周柱史
白衣誰識李山人鋪陳禮樂三千字保障東南億萬民
戡定成功在今日未容歸卧五湖春

賀王彥誠新除授浙江省左丞之命

南省新堤已築沙禁城猶是舊京華山中未識將軍樹

天上新頒宰相麻紫電青霜開武庫金符玉節擁高牙
東南定亂成功了四海車書共一家

送吳志學通州帥府副元帥

立馬狼山最上峯青天白日見英雄防邊肯發屯田計
富國兼收煮海功烽火連營平野北樓船醞酒大江東
干戈八載天應厭笑挽扶桑早掛弓

送沈玉泉書藥舟

一舸寬於一畝宮兩溪無處不春風遙知蓬下觀書者

即是壺中賣藥公
嘯隔滄洲聲似虎
丹藏別室氣如虹
平生悔不謀深隱
蓑笠何時與子同

三月十五陪烏本初同僉李希顏祭余廷心大
叅於斷崖因賦是詩以約明年更祭云

七年苦戰守孤城
食盡無人發救兵
諸將赴河同日死
萬家壕地幾人生
中台星折天應泣
大節堂空鬼亦驚
國難未平公已往
臨風西望泪縱橫

海陵錢文憲母汪節婦卷後

白髮孀居喪亂中苦心仍與栢舟同事夫在昔如賓禮
教子於今有父風麻象服勞忘夜寢染盛供給願年豐
男兒餓死渾閑事撫卷題詩意未窮

寄興聖寺琦元璞長老兼簡黃庭英知事

太息衰年七十強經旬留宿贊公房上堂也趁闍黎飯
入閣仍分般若湯華渚虹霓生雨氣法筵龍象識天香
遙知今夕南湖月誰與郎官共晚航

題茅子剛虛白齋

青袍朝士齋居處一掃淄塵萬慮忘四壁東西凝雪色
八窗曉夜發天光茅君為爾傳宗旨莊子由來止吉祥
有客坐馳空熱惱不知此地有清涼

賀顧克善授平江經歷

吳門五月看除目喜見郎君好姓名畫省故人持酒送
黃堂太守下車迎百年治道隨天運一代人才出旦評
上相憂民何以報會將新政致升平

寄楊子尊聖寺處厚子元上人

不出空山復幾年
衲衣草座獨安禪
別峯行道諸天上
善月翻經古佛前
兵後佳期何日共
春來妙句有人傳
三生彷彿當相識
目送孤鴻落照邊

贈謝太守除杭州

朝廷遣使航東海
萬里南來送璽書
着屐登山良不惡
分符曲郡復何如
李蘇事業千年後
吳越封疆百戰餘
今日養民方急務
肯將徵算及舟車

寄蔡彥文掾史

鳳凰池上神仙吏却是中郎幾葉孫
幙下豈無奇計出
床頭猶有異書存
防秋列寨山如戟
蒸土為城鐵作門
何限民間可憂事
老懷那得與君論

奉答道林書記二首

何年飛錫度江城
林下相逢眼倍明
老子豈能知藥性
阿師寧獨擅詩名
江風滿座簫簫合
石雨侵牆薜荔生
莫把舊家無孔笛
月明吹作鳳凰鳴

獅子林中夙夜緣
杖藜來往意方堅
白蓮社友須元亮

金粟如來是謫仙
淨梵六時嚴戒律
長齋十日斷葷羶
翛然古竹長松下
還許山僧醉後眠

和南宗上人高韻就呈可庭山主詩

老去喜逢方外友
一菴瀟洒闔閭城
野猿掛樹窺行道
山鳥當牕候出鳴
空界可能容我醉
新詩一復見君情
維摩示疾今朝起
拭目街頭看太平

送陳性之崑山從事

只將從事寫前銜
省檄封來自拆緘
六案更須勞彩筆

一官猶未換青衫風生海市朝持酒日落江城暮卸驂
我未識君空悵望恍如烟水隔仙凡

題金太醫杏林詩卷

董奉仙居不可尋君家種杏亦成陰禁方傳後龍歸洞
嘉果生時虎守林不厭隣翁來乞藥每留漁父坐聽琴
年年二月花如海應是先生樹德深

奉題王左丞卧雲軒

東山雲氣盡溶溶左轄高居第幾重玩世也為莊叟蝶

濟時仍起武侯龍
風簾霧箔秋同被
玉室金堂夜不封
說向九江李太白
結巢休羨古時松

題朱叅政松石軒

長松落落風塵表
蒼石庚庚太古心
屹立乾坤無改色
扣如金玉有餘音
人間兒女天機淺
海上神仙野趣深
獨有奇章知此適
子孫清賞到於今

題羅成之藏柯敬仲懸崖竹

丹邱畫竹出新意
醉墨落紙秋淋漓
青天低垂鳳凰尾

碧海倒挿珊瑚枝誰家俗士謾食肉何處高人來賦詩
丹房月夕起清思莫遣風雷生葛陂

題馬縣尹壽椿堂

緜緜靈氣與天遊日月盤旋定幾周七十三翁同甲子
八千餘歲一春秋欲詢齊物南華老誰是平生馬少遊
堂下芝蘭森玉立未容丹桂獨風流

再遊金山寺

放船重到金山寺獨對滄江照髻絲過客謾驚天險處

老僧曾見海枯時
通宵月色魚龍喜
絕頂秋聲鸛鶴悲
瓊樹花開不歸去
妙高臺上要題詩

題石林茅屋

春林深深石如笋
我屋正在林之西
結茅不放風雨入
種樹乃與崗巒齊
天寒白鶴向人語
日暮野鳥來上啼
浣花老人不可作
何處客至同幽棲

題王維賢所藏盛子昭畫雙松繫舟圖

雲門寺前風物幽
布襪青鞋吾昔遊
葫蘆盛酒待明月

舳艫載琴當上流長松並立幾千尺狂客一別三千秋
何當掛席過湖去東里草堂姑少留

送邵彥清之浙西憲史時有高德晉同日應辟
之江西所以詩中故及之

西浙西江同應辟此時此會記清歡兩賢共起諸侯幕
十載誰先御史冠野寺聽蟬秋冉冉津亭維馬雨珊珊
清時事業須公等老我山中拭目看

題俞仲桓雙林道人卷

雙林道人如霜林叅天勁木寒蕭森衆芳到此萬葉脫
元氣授爾孤根深風前猛虎作人嘯月下清猿將子吟
鐵笛老仙在何許吾欲載酒同幽尋

宿鶴沙張氏草堂

草堂借我作行窩杖履頻煩太史過滿地白雲清晝永
隔溪黃鳥綠陰多銀瓶自瀉中山酒鐵笛誰翻小海歌
今日逢君須盡醉西家亭館奈愁何

次楊太史之韻題贈葉子澄草堂圖詩

君家草堂林木幽乃在吳會之東頭
花開從今鳥雀喜水落正為魚龍憂
深林爛飲枸杞酒如意醉擊珊瑚鉤
丈夫嘉遁有如此傍人比是神仙流

送陳希文北遊

萬里中原道路長關河環繞五雲鄉
心馳天上黃金闕夢憶山中紫翠房
人海魚龍三月浪御街車馬五更霜
丹墀奏罷中興頌燄燄聲名動北方

題錢伯玉南園小隱

君是錢王幾葉孫
浮雲富貴不須論
丈人屋上烏仍好
處士籬邊菊尚存
招隱辭章娛日月
表忠碑刻照乾坤
明當載酒來相覓
爛醉君家老瓦盆

題楊仲德照磨自汴梁歸話中原荆棘蔽野人
烟斷絕聞復山東感而賦此

故人歸報朔方兵
已下山東七十城
日月未教烏兔死
風雲方更虎龍爭
入關謾爾窺周鼎
背水今誰立漢旌
北望中原五千里
黃河之水幾時清

重遊虎邱寺

海湧峯頭行逕微，芒屨欲趁孤雲飛。
風高木客作人語，月出天王騎虎歸。
傑閣重樓遞隱見，寒泉古木相因依。
荒邱王氣豈消歇，千將莫耶千載稀。

寄題松江之青龍瞿睿夫通波草閣詩

五月通波草閣寒，綠陰長日此凭欄。
山如碧鳳參差出，江作青龍左右蟠。
攬子燒香雲母火，櫻桃行酒水晶盤。
老夫亦有鵝溪絹，也欲相從看寫蘭。

寒舍為偷兒見顧竊去珠環首飾賦以自遣

太息偷兒也自頑踰垣何意到山間
潛蹤深夜開重穴竟造中堂啓四關
獄吏肯追金壁返家人猶望去珠還
愁來幸喜青氈在覓紙題詩一解顏

題何德深溪南小隱

宰相官之不受招碧梧林巷自逍遙
溪頭二月花先發洞裏千年雪未消
朝士過門時載酒仙人飛珮夜吹簫
社圖誰寫耆英會還肯中間著老樵

寒食日松江有懷廣陵

老來也欲惜年華春正濃時不在家江上苦遭寒食雨
夢中猶見廣陵花書藏舊篋應無恙酒憶新樓不用賒
日暮荒城聞鬼泣東風吹恨滿天涯

送秀巖上人歸日本

幾年中國遊方遍看水看山念念非海眼枯時千劫壞
日頭出處一僧歸黃梅雨打袈裟溼白蜃雲隨錫杖飛
富士巖前留語在庭松新長舊禪扉

題上海靜安寺綠雲洞天為寧為無寺之祖師

鰕子和尚

滬瀆城西古道場
洞天深處綠雲涼
雨昏不辨琅玕色
日轉都成翡翠光
春水滿溪鰕子活
午陰當戶鳥聲長
華陽老客家何在
擬伴高僧坐石床

別茆府判

封印歸來寡送迎
畫橋門巷水同清
二分明月杯中瀉
九朶春雲筆下生
賓客班荆談雅道
兒童騎竹頌廉聲

奚須老拙揚人善公府爭傳好姓名

三月十日移居

山人垂老厭奔波客裏移居可奈何
居竹軒中無長物採蓮涇上有行窩
幾莖白髮梳來短千古清尊飲尚多
最喜東隣王處士閑來無事肯相過

送毛自得北遊

平原門下客三千毛遂當時獨妙年
脫穎機鋒吾已得治安籌策子何先
江淮故道蒼烟外楚漢孤城落照邊

今日送君何限意祇將忠孝足家傳

次饒介之遊東臯佳作

半雨半晴春更佳也知郭外少紛華
蠻王埠頭多載酒李家園中來看花
曲闌芳檻遞隱見蒼松老竹相交加
安得長繩繫烏足不放西崦紅日斜

縱飲狂歌晚未歸松陰香霧轉霏微
醉中漫喜朱顏在頭上爭禁白髮稀
無數野花迎客喜一雙沙鳥傍船飛
浣花溪上真堪笑每日朝回只典衣

草草盃盤也自佳名園今日有光華東風淡起雲漠漠
胡蝶飛上蕪菁花百年酒伴無多在一夜春愁十倍加
明朝應被傍人笑醉裡題詩字半斜

不用人扶醉裏歸水邊楊柳晚風微一年春事又將半
三月捷音何太稀莫倚書囊談未了却憑藜杖步如飛
入城彷彿嚴更動冉冉花香尚滿衣

同張仲舉宿寒橋

柔艣聲乾破寂寥青山磯下宿寒橋乾坤萬事雙蓬鬢

風雨孤舟半夜潮，丹鳳不來秋又老。
玉人何處水空遙，幾時更醉秦淮酒。
細聽漁樵話六朝。

李子英心遠亭

門外黃塵掃不開，何由吹得到靈臺。
閒看倦鳥投林去，靜愛孤雲出岫來。
彭澤高人多逸興，峨眉仙客有天才。
祇今誰到悠然處，同採秋香共一杯。

寄王仲汙御史左遷之安慶府判詩

青驄馬鳴催趣裝，日出未出江茫茫。
但願四海有武備，

不可一朝無憲綱攬搶經天墮作石沆瀣着地凝為霜
先生憂國髣未白至今臺柏留輝光

王澹園明道堂

重闌飛構入清溟虎豹森羅戶不扃紫氣擁闔周問禮
玉光浮座漢傳經日斜海霧侵香案夜靜天風語鐸鈴
幾度澹淵來說法泉中應有老龍聽

送袁季文之帥幕

少年書劍學從軍幙府於今氣不羣白髮元戎多好武

青衫從事最能文
帳前草檄花如雨
江上維舟水似雲
把酒高歌成遠別
不知何處又逢君


送張士行士明會試

山東秋榜得豪英
誰似君家好弟兄
四海賓興得兩舉
七千鄉貫占三名
大蘇衣鉢都源委
小宋文章更老成
明日鵲原同送喜
早將春信到江城

南城暮春

南城雨盡午風和
二客相從步屨過
流水陂塘春事減

落花門巷晚愁多銀瓶自瀉沙頭酒寶瑟誰調陌上歌
莫寫江南斷腸句賀郎憔悴髮空皤



居竹軒詩集卷二